

李文忠公奏稿

李文忠公奏稿

卷之三十八目錄

巴西議約竣事摺

光緒六年八月初一日
附照會照覆稿

馬廠請發部照摺

光緒六年八月初三日

各省紳民捐賑獎敘摺

光緒六年八月初三日

津關邊餉請緩籌解摺

光緒六年八月初三日

電軍請撥官馬摺

光緒六年八月十二日

請設南北洋電報片

光緒六年八月十二日

覆奏言路條陳摺

光緒六年八月二十二日

妥籌鮑軍事宜片

光緒六年八月二十二日

妥籌朝鮮武備摺

光緒六年九月初四日
附來函禮單及移部咨件

操演水兵備用摺

光緒六年九月初四日

曾國荃力疾辦防片

光緒六年九月初四日

海防支應請銷摺

光緒六年九月初十日

妥籌朝鮮製器練兵摺

光緒六年九月二十七日
附代擬各條

擬議朝鮮來學章程片

光緒六年九月二十七日
附章程

朝鮮通商西國片

光緒六年九月二十七日
附筆談問答

鮑超赴防片

光緒六年九月二十七日

李文忠公奏稿卷三十八

全集之三十八

桐城吳汝綸編錄

巴西議約竣事摺

光緒六年八月初一日

奏爲遵

旨與巴西使臣議立通商條約現已事竣恭摺仰祈

聖鑒事竊巴西國正使喀拉多副使穆達於六月初抵津經臣接晤開導該使堅求循例議立通商條約並未提及招工當將情形奏報請

特派議約全權大臣就近會商妥辦欽奉六月初八日

上諭已另有旨派李鴻章爲全權大臣事關通商立約該大臣務當悉心籌畫按照各國約章酌議變通總期周密妥善免致將來窒礙本日簡派全權大臣諭旨一道一併發往如該使索看憑據

卽著李鴻章恭錄給與閱看俟議約事畢此旨仍繳還軍機處備查等因欽此臣以津海關道鄭藻如熟悉洋情辦事精覈候選道馬建忠游學西洋多年於各國交涉事例探討極熟遂督同鄭藻如馬建忠悉心籌酌與該使喀拉多等往復會議查中西互市以來立約十有餘國因利乘便咸思損我以自肥若不設法維持逐漸收回權利後患殊多此次巴西議約數易其稿幾於筆禿脣焦嗣以祕魯條約爲底本刪去招工各條並參用別國條約定爲十六款該使旋以第七款開有文義重複請酌刪字句因無甚緊要亦卽允行其關係中國權利者皆力與辨論變通酌訂如第一款兩國人彼此皆可前往僑居句下添入須由本人自願一語卽寓禁阻設法招致之弊第三款設立領事官必須奉到駐紮之國批准文憑方得視事如辦事不合可將批准文憑追回本係西國通

例其立法之善有二一則其人或非平素公正或與我國向不浹洽我皆可以不准一則通商口岸或係新設人情未安不欲領事驟至我亦可以不准至辦事不合追回文憑是予奪之權我亦得而操之從前中國與各國立約因不知西例皆未議及此層是以各國派來領事我竟不能過問中國派赴各國領事則須該國在認乃得充當殊於體制有礙今特於巴西約內添入俟開辦時擬由總理衙門即將批准文憑咨送南北洋大臣發交各關道轉給俾示維繫惟變法之初未可過於嚴峻以後他國換約修約咸知辦理近情而又偏於公法或可冀其仿行不致相率堅拒第四款游歷執照一節洋人游歷各處多出領事自填執照送請關道用印幾若內地往來全憑領事作主今改爲領事照會關道請領印照可稍助地方官之權第五款遵守專章一節卽是德國新約第

一款之義查均需二字利在洋人害在中土設法防弊實爲要圖
前閱日本近與各國議改約稿於優待別國提明出於甘讓及互
相酬報字樣蓋曰酬報則必彼國有利益予我而後我國以利益
酬之卽遇強國從權予以利益彼強國亦必有益我數事以副酬
報之名曰甘讓則必彼此重在交誼而非屈於勢力果能堅守此
義則凡希冀同需者非先允遵守酬報之專條我可不准或其酬
報之專條不能一體盡遵我亦可以不准或我所讓與別國之利
益非出甘心則局外雖欲援例同需我仍可以不准也今參用此
義特爲聲明嗣後如有優待他國利益彼此須將互相酬報之專
條或互訂之專章一體遵守方准同需優待他國之利益似較周
妥第六款本擬照德國新約酌用漏報捏報辦法惟巴約係仿祕
魯約本並無通商詳細章程若僅添漏報捏報一層轉恐掛一漏

萬今定爲兩國商人商船凡在此國通商口岸卽應遵從此國與各國原議續議通行商務章程辦理卽有續議字樣不特德國漏報捏報充公議罰之章巴西理當遵守卽後此再有商務新章巴西亦應照辦似更包括第九第十第十一第十二等款皆指問案之事查西國案件俱由地方官訊斷領事不得干預惟中西律法懸殊各國不能聽地方官審辦於是領事遂有其權此次本擬參酌西國公法問案專歸地方官而科罪則各照其國律巴西使臣旣不肯首先改章致招各國之怨適德國公使巴蘭德過津從旁酌商乃定爲被告所屬之官員專司訊斷各照本國律例定罪蓋被告多係華民前因會審掣肘喫虧不少茲由被告所屬之官訊斷當可持平辦理其華民在各口行棧商船傭工者大都恃洋人爲護符遇有犯案不聽傳喚雖照會領事飭交而洋人轉爲庇匿

貌法養奸所關匪細茲於第十款內議明聽中國官員派差徑往
拘傳審理以免底縱又第十一款內將來另議中西交涉公律巴
國亦應照辦一節雖公律驟難定議究爲洋務緊要關鍵特倡其
說以作權輿以上各節皆臣按照各國約章酌議變通期歸妥善
該使喀拉多等初甚狡執徑欲照英法舊約辦理反復爭辨兩月
之久始就範圍今既遵允勢固不能中悔將來各處循照議定條
款妥慎辦理凡緊要樞紐勿任略有通融冀可漸收權利至洋藥
一項雖非巴西出產惟中土受害滋深今議令該使知會該國外
部查酌禁止巴商販賣先由該使具備照會送臣存案臣亦給予
照覆現將議定條約配用中國文巴西文法國文各四紙校對無
訛卽於八月初一日在公所會同畫押鈐印彼此各存正副本二
分以便屆時互換除將存留條約正本又照錄禁販洋藥來往照

會備文封送軍機處代爲進呈

御覽原奉全權大臣

諭旨敬謹封固咨繳軍機處備查並將條約副本咨送總理各國
事務衙門查核外所有巴西議約事竣緣由理合恭摺由驛覆陳
伏乞

皇太后

皇上聖鑒訓示謹
奏

謹將巴西國議約案內禁販洋藥及領事批准文憑交發並
無費用來往照會鈔錄恭呈

御覽

巴西國使臣喀拉多穆達原來照會

爲照會事本月二十一日本大臣與鄭關道馬道臺會商約稿除
法文另行修飾更正外所有條約各款業已商定本大臣甚爲欣
悅其巴民不得販賣鴉片一語鄭關道馬道臺屢奉貴大臣鈞諭
重申前議本大臣惟遵奉國家指意來華議約使各國商民在中
國所得之益亦使巴民一律均霑惟念巴國商民來華貿易卽不
販賣鴉片一貨亦無害經營之盛大是以本大臣欲滿貴大臣之
所願擬不日咨會本國管理外部大臣禁止巴商不准在中國販
賣鴉片但此件另於條約之外附一公牘並聲明兩國領事官所

奉到駐紮之國批准之文憑其臨時彼此交發均無費用等語可也卽希貴大臣照覆以無論日後巴國外部果否允准禁止商民販賣鴉片不得因此一端致阻和款卽日定約畫押蓋印仍俟兩國御筆批准再行更換則貴大臣之所以酬本大臣者可云厚矣須至照會者

光緒六年七月二十一日卽西歷一千八百八十年八月二十七日

照覆該使臣喀拉多等原稿

爲照覆事查此次商定條約各款旣蒙貴大臣允卽咨會管理外部大臣禁止巴商不准在中國通商各口販運鴉片具徵貴大臣存心公正曷勝欣佩本大臣暫允此事不列條款之內彼此附一

公牘存案卽日先將條約蓋印仍俟兩國
御筆批准再行互換之日公同商酌將禁止巴民販運鴉片一節
另行備文知照至約內兩國領事官必須奉到駐紮之國批准文
憑方能視事此項文憑臨時彼此交發均無費用合併聲明爲此
照覆貴大臣查照須至照覆者

光緒六年七月二十六日

馬廠請發部照摺

光緒六年八月初三日

奏爲口外現辦馬廠地畝必須先發部照以示大信而免疑沮恭摺陳仰祈

聖鑒事竊臣前就獨石口外惠鑑馬廠地畝酌擬現辦章程十一條專摺奏報聲明張獨多三廳各旗官荒馬廠已欽奉

諭旨開派前口北道奎斌馳往督辦即可仿照通行辦理旋經戶

部覆稱所議各條或遵照戶部奏章或參酌地方情形既經奏交

地方官辦理應由該督慎委賢員實心舉辦就地酌核時宜戶部

不爲遙制其所請由部發給空白執照雖爲便民起見惟地冊未

經造送礙難率發應由直隸藩司先備空白印票發交委員諭令

地戶交納押荒銀兩先給印票一面由司造冊送部填給執照再

交地戶收領換繳印票等因當經分行遵照茲據前口北道奎斌

稟稱前奉奏定章程業將一面呈交押荒銀兩一面徑給部照事
宜徧行曉示已據地戶具有見照交銀甘結今戶部又有先給司
票之議自應委曲求全當卽督同委員切實勸導地戶乃愚民難
與圖始其希冀中飽之徒又復從中煽惑謂甫經開辦卽改章程
可見部照萬不能發司票萬不足憑此次交納押荒恐仍被人愚
弄於是地戶數百人環集地所爭來詢問雖經剴切譬曉終難破
其疑團實有不能先給司票之勢以致失信於民稟請續奏前來
臣查口外官荒地畝招商承辦弊端百出地戶屢費重資今甫改
歸地方官經理責令按畝交納押荒升科在官以爲初徵在民實
係重出勸辦本非易事且從前商人先給私照亦謂將來換領部
照乃所費盡入私囊部照終歸烏有地戶受累無窮此次力洗商
人盡

國害民積弊必先請發部照與押荒同時交領諭以執此確憑永爲世業用能悚聽改觀迎刃而解若先給司票將來再換部照則與商人先給私照辦法無異積弊之後奚能取信於民況一面交銀一面給予部照之議早經大張曉諭忽又改爲司票殊覺自亂其例愚瞽者從此滋疑刁健者藉端抗欠匪徒之煽惑有詞委員之辦理失據實於

國課民情多所窒礙部臣旣深悉押荒零星責令地戶赴部交納領照往返苦累請頒執照係爲便民起見惟謂委任恐不得人難免不滋流弊不知錢糧分數有王公私租可以比較押荒交局錢糧交廳彼此參觀亦可互見其地數糧數冊籍仍須責成藩司逐細核明報部必應針孔相符涓滴不漏斷不至漫無考核欲防流弊但在責成委員不在遲留執照此係邊外大段官荒迥非內地

零星報墾升科可比前已欽奉

寄諭酌辦卽戶部亦令就地酌核時宜不爲遙制斷難拘守常例
致令掣肘且民間輸納押荒全在秋成糶糧之後若不及時給照
將致垂得之巨款無端渙散機會一失以後民不信官更難爲繼
臣體察情形部照之遲速實爲辦地緊要關鍵現委各員皆經遴
選認真辦事之人臣敢保其絕無流弊現在三廳所屬地畝均可
次第開辦不僅庶鑑馬廠一處需用部照較多相應仰懇
天恩俯准敕部迅速頒發空白執照二千張務於八月內頒到以
便轉發該道督飭委員照章認真查辦收取押荒庶足以示大信
而免疑沮民心可定地利可興餉需亦不無裨助矣理合恭摺據
實瀝陳伏乞

皇太后

皇上聖鑒訓示遵行謹
奏

各省紳民捐賑獎敘摺

光緒六年八月二十二日

奏爲各省紳民捐助直賑仍請給予銜封獎敘以維時局恭摺仰祈

聖鑒事竊准戶部咨開上年直隸冬賑收捐銀九萬八千兩棉衣一萬數千件准照例定銀數以十成實銀核給虛銜

封典其自今年春撫以後勸捐各款應照咸豐元年江蘇紳民捐賑之案給予議敘無庸請給銜封等因查上年四月部議停止捐輸辦理常捐未盡事宜捐內聲明賑捐有限外呈請及奏咨報部者一律祇准本身子弟請獎虛銜

封典不准再請實官以示限制並無限外奏咨報部之賑捐祇准議敘不准請給銜封之說是以上冬今年直賑需款敦請各省賢紳分撥勸捐皆許以按照例定銀數收捐十成實銀核給虛銜

封典並於去臘預行奏明奉

旨該部知道欽遵在案其時戶部亦無異議今閱半年有餘忽行
改照蘇省遠年成案議敘殊於賑務民生有礙直隸連遭災歉閭
閻窮苦異常賑撫所需多賴外省紳庶集捐接濟藉保民命該官
紳不分畛域遠道樂輸實堪嘉尚自應照章獎勵上屆晉豫賑案
尙准推廣捐章優給道府州縣翎枝等項直隸災狀與晉豫相同
從無推廣之請臣深知慎重名器未敢稍涉冒濫去年停捐實官
卽將應獎佐雜等項一律截止惟夏秋仍有水災今年入夏以來
又因上游山水漲發窪區復被淹浸待賑戶口極繁且有應修隄
河亦須以工代撫核計用款甚巨近畿荒政實與他省偶遇水旱
情事不同本省向係缺額庫儲支絀太甚地方商富無多且節次
集捐爲數不少勢難再借民力惟有仍仗南省勸捐濟助但各處

捐輸早成弩末必須多方勸導設法招徠所藉以鼓舞者值此銜封兩項無傷政體有益災區若照部議併此不給非但失信於隔省好善紳民且必聞風裹足勸辦益形棘手來源一絕將坐視斯民委填溝壑而不能救關繫實非淺鮮據籌賑局司道具詳請奏前來相應仰懇

特恩俯念畿疆要地民命至重連年重災疊困非他省偏災偶賑可比既無帑項可靠當賴外省官紳集捐尤難失信准將直隸一省去冬及今春以後賑捐均照部定新章例銀數目以十成實銀一律核給本身子弟虛銜

封典他省不得援以爲例以維時局而資觀感如此辦理則捐款不致立竭實有存亡呼吸之機獎敘並非實官斷無濫襲名器之慮其部庫兌收常捐條款尙多亦不致有妨礙理合恭摺具陳伏

乞

皇太后

皇上聖鑒訓示施行謹

奏

津海關邊餉請緩籌解摺

光緒六年八月初三日

奏爲津海關六成洋稅收不敷支請將添撥邊餉俟將來察看籌解恭摺仰祈

聖鑒事竊照戶部前籌東北邊餉擬每年指撥津海關六成洋稅銀八萬兩自光緒六年爲始按年解部等因奏奉

諭旨轉行欽遵在案茲據津海關道鄭藻如詳稱津海關徵收洋稅招商局稅每年不過銀三十餘萬兩惟上年收銀四十二萬餘兩係屬極旺之年爲近來所未有然照章劃去四成二成暨出使經費等項淨餘六成銀二十萬餘兩再除額支稅務司薪水銀三萬六千餘兩實僅得銀十六萬六千餘兩向來津郡海防練軍各餉取給於六成項下者一爲大沽北塘海口礮臺兵勇一爲駐津及援奉練軍一爲雲字營馬隊一爲葛沽新城練兵皆屬急要之

需不可緩欠現將駐奉練軍撤回一併布置海防斷難令其枵腹從事上屆稅收雖旺六成所入尙不敷支本年中俄改約警信紛傳來貨稀少權徵短絀決無上年之數關稅視乎商貨非人力所能強增津餉歷久供支非臨事所能驟減目下各營兵勇待餉甚殷關庫空虛無以濟急且另有應解抵閩京餉亦無的款可指窘迫情形不堪言喻惟有請將添撥邊餉俟將來再行察看但使稅收稍旺卽不能如額自當勉力籌解等情請

奏前來臣查津沽係

京師切近門戶華洋雜處水陸交衝不得不就地籌餉練兵稍資拱衛其情形實較東北邊防爲重是以津關六成洋稅向准留充防餉以顧根本約數亦不過十餘萬兩現值海防喫緊稅收短絀支應踴躍餉需爲軍上命脈設有不繼關緊匪輕莫名焦棟邊餉

亦屬緊要何敢稍涉膜視但力量所限一時委難兼營惟有籲懇
天恩俯念津防需餉至要暫准免顧邊餉將來稅收稍旺再行察
看籌解俾資周轉理合恭摺具陳伏乞

皇太后

皇上聖鑒訓示謹

奏

巡軍請撥官馬摺

光緒六年八月十二日

奏爲巡軍應需馬匹現已采購不及請撥給察哈爾牧羣官馬以免貽誤恭摺仰祈

聖鑒事竊臣欽奉八月初八日

寄諭鮑超所稱巡軍向有馬隊三千名著在原募二十三營內酌量改設毋庸添募其需用馬匹鞍轡著李鴻章派員采購等因欽此遵查馬匹產於塞外采購必須及時夏令草茂畜壯到處成羣采購自易現已八月中旬賣者次第收場塞外嚴寒九月卽有大雪派員前往計已過時且所需至三千匹之多勢難於收場後零星搜索餉需又極支絀亦無從籌墊巨資惟有撥給官馬之一法查察哈爾牧羣官馬本備

國家征調之需自內地軍務告竣羣生日夥足以上屆直隸災歉

儘有餘力撥濟貧農今冠軍爲畿境海防策應之師需用戰馬孔亟自可如數調派俾得迅速成軍相應仰懇

天恩敕下察哈爾都統分飭商都太僕寺牧羣各總管卽於孳生官馬項下起備能戰馴馬三千匹向來軍營請調官馬口老瘦瘦者居多此次係海防要需未便稍有含混臣於奉

旨後擬派素習馬政之記名提督楊安典馳往口外牧羣會同各該總管認真挑選不必拘定商都挑幾成太僕寺挑幾成務須合併揀擇一律口輕臚壯足經戰陣以期得力而免誤事並飭楊安典一面挑選一面卽分起派弁押送進口以便陸續撥給鮑超成營操練該軍馬隊如可酌減則下餘之數臣部各營正缺戰馬亦可藉以撥補應需領解馬匹委員兵夫盤費口分等項由臣勻籌撥給仍令沿途州縣照章餵養妥爲照料以利遄行其鞍轡一項

另再籌酌采辦所有軍應需馬匹請撥給牧羣官馬緣由理合
恭摺山驛具陳伏乞

皇太后

皇上聖鑒訓示施行謹
奏

請設南北洋電報片

光緒六年八月十二日

再用兵之道必以神速爲貴是以泰西各國於講求鎗礮之外水路則有快船陸路則有火輪車以此用兵飛行絕跡而數萬里海洋欲通軍信則又有電報之法於是和則以玉帛相親戰則以兵戎相見海國如戶庭焉近來俄羅斯日本國均效而行之故由各國以至上海莫不設立電報瞬息之間可以互相問答獨中國文書尙恃驛遞雖日行六百里加緊亦已遲速懸殊查俄國海綫可達上海旱綫可達恰克圖其消息靈捷極矣卽如曾紀澤由俄國電報到上海祇須一日而由上海至京城現係輪船附寄尙須六七日到京如遇海道不通由驛必以十日爲期是上海至京僅二千數百里較之俄國至上海數萬里消息反遲十倍儻遇用兵之際彼等外國軍信速於中國利害已判若徑庭且其鐵甲等項

兵船在海洋日行千餘里勢必聲東擊西莫可測度全賴軍報神速相機調援是電報實爲防務必需之物同治十三年日本窺犯臺灣沈葆楨等屢言其利奉

旨飭辦而因循迄無成就臣上年曾於大沽北塘海口礮臺試設電報以達天津號令各營頃刻響應從前傳遞電信猶用洋字必待繙譯而知今已改用華文較前更便如傳祕密要事另立暗號卽經理電綫者亦不能知斷無漏泄之慮現自北洋以至南洋調兵饋餉在在俱關緊要亟宜設立電報以通氣脈如安置海綫經費過多且易蝕壞如由天津陸路循運河以至江北越長江山鎮江達上海安置旱綫卽與外國通中國之電綫相接需費不過十數萬兩一半年可以告成約計正綫支綫橫互須有三千餘里沿路分設局棧常年用費頗繁擬由臣先於軍餉內酌籌墊辦俟辦

成後仿照輪船招商章程擇公正商董招股集貲俾令分年繳還
本銀嗣後卽由官督商辦聽其自取信資以充經費並由臣設立
電報學堂雇用洋人教習中國學生自行經理庶幾權自我操持
久不敝如蒙

俞允應請

飭下兩江總督江蘇巡撫山東巡撫漕河總督轉行經過地方官
一體照料保護勿使損壞臣爲防務緊要反覆籌思所請南北洋
設立電報實屬有利無弊用敢附片縷陳伏乞

皇太后

皇上聖鑒訓示謹

奏

覆奏言路條陳摺

光緒六年八月二十二日

奏爲疊奉

寄諭彙摺覆陳仰祈

聖鑒事竊七八月以來言路條陳天津軍事仰煩

宸慮飭臣妥籌辦理茲謹分條逐一覆陳七月初二日御史黃元

善奏天津海口嚴加防範一摺臣查津沽之防本未嘗一日鬆勁

洋人來晤者或稱沿海空虛甚多或謂各路兵勇不盡得力

臣爲大局計不能不心以爲危若就津沽論彼尙未敢恫喝臣亦

未稍爲所動也御史邵曰濂請酌派曹克忠倡辦天津團練與庶

子張之洞奏沿海宜辦團練大意略同夫民團不能與洋兵搏戰

人人知之粵捻之役幾二十年辦團幾徧十八省其能助官軍擊

賊者寥寥可數而斂費擾民抗糧拒捕之弊百出不窮至堵禦外

夷又與剿辦內匪迥別各國虜聚口岸若無事而自擾之或爾莽從事爲患更甚或謂津民好義尙氣然咸豐庚申大沽之敗未聞民團有與敵爲難出死力幫同堵剿者臣與曹克忠商議該提督謂有警之際或可集眾助勢目下兵未動斷不宜稍涉張皇搖惑民心與臣所見相合又七月十一日張之洞條陳海防事宜一摺內稱天津重兵不宜全聚海口臣處本係如此籌辦大沽海口現派副將羅榮光練兵一千八百人親軍礮隊五百人分守南北岸礮臺而助以記名總兵劉祺直字營勇千人副將史濟源練兵五百人北塘海口現派通永鎮總兵唐仁廉統帶練兵一千二百人仁字營勇五百人分守南北岸礮臺而助以參將趙義營勇五百分防煙頭沽至大沽後路以新城爲扼要前雲南撫臣潘鼎新督同提督葉志超練軍馬步四營守之北塘後路以蘆臺爲扼

要直隸提臣李長樂督帶練軍及武毅馬步四營守之提督周盛傳所統盛字馬步十六營令其暫駐小站馬廠一帶距大沽數十里至百餘里提督劉盛休所統銘軍馬步十一營令其暫駐興濟鎮距北塘約二百餘里意在布遠勢蓄威重作爲兩路策應游擊之師視敵所向卽率行隊縱橫援剿臣自督天津淮練七營居中調度目前分數層扼紮有事時可首尾相應正不必拘定某處爲二敵三敵四敵也又稱大沽營口宜備水師爲奇兵查大沽現有新購蚊船四隻與礮臺相依助自可相機夾擊沿海漁船各有生業未便多調亦斷不能驅令圍攻敵船又稱提督劉銘傳總兵張得勝婁雲慶王可陞均請催調赴津查劉銘傳將略最優臣於春間遵

旨函商該提督北來襄助接據緘覆大病之後肝火內鬱兩目昏

脩難遽行昨復欽奉

諭旨飭催來京臣又備文加函敦勸矣該提督勦盜智略實在鮑超之下昔年督辦陝西並未遇賊竟遭譏毀素性耿直不受羈勒未免抑鬱以去此次如投袂赴

闕惟祈

溫諭慰勉假以事權其才可當一面至張得勝戰陣頗勇訓練稍疏自無庸令募楚勇聽用雲慶王可陞各有本任職守亦無庸紛紛檄調又七月二十日洗馬周德潤奏速籌戰守一摺內稱淮軍將驕卒惰素耽安逸惡戾潰散等語查津防淮軍無事時督令築城浚河屯田穿渠修整礮臺營壘工作之暇朝夕練習鎗礮講求西洋操法其勞苦倍甚於他軍所謂驕惰安逸者何在臣於本年二月十九日已附片奏明斷不至臨敵潰散貽

君父憂不謂積誠未足以感人闔修未足以孚眾惟有恪遵

聖訓明定賞罰認真操練精益求精冀得一當以副責望至稱平
原空闊宜掘地作營以避鎗礮查營內穴地避礮乃兵家常用之
法平原則不相宜若我兵盡藏穴中敵至將掩覆之聚殲之耳安
能制敵又八月十七日御史蕭韶奏吉林緊要請調勁旅一摺內
稱琿春東北俄兵湊集淮軍鎗礮較精請抽調四五百人馳赴該
省交銘安等調遣並酌調各省勇丁填紮原駐地方等語查吳大
澂赴吉時曾商調直隸州知州戴宗騫選擇淮軍熟悉洋操將弁
勇丁三百人帶往臣並酌給後門鎗開花礮若干令戴宗騫於七
月閒啟程比當抵吉就地添募逐漸訓練藉開風氣至臣部淮軍
上年遵部議裁減後僅有二萬八千餘人分防天津保定馬步只
一萬六千餘人布置要地屏藩京畿固不可再稍抽動其分防江

南一萬餘人駐扼吳淞江陰揚州金陵等處亦皆江海門戶劉坤一奏請臣勿調赴直更不便抽赴吉林至所稱由他處調勇填補除沿海省分勿庸議外湖北自調李長樂之武毅軍劉維楨之忠義營赴直其留防不及十營安徽自調郭寶昌所部赴直留防亦無多人江西防勇本單均難酌撥且內地防軍但取彈壓土匪而已器械不精操練不熟慮未足以當大敵南北海疆關係重要豈可於臨敵之際易將撤兵顧彼失此吉林現有銘安吳大澂添練各隊加以舊日新募五千人果能認真訓練精求軍實或可稍壯聲威臣職司拱衛熟審機宜謹就一得之愚據實覆陳由驛四百里具奏伏乞

皇太后

皇上聖鑒訓示謹

奏

安撫鮑軍事宜片

光緒六年八月二十二日

再啟奉

寄諭准鮑超募勇一萬三千八百人由輪船北來於天津山海關兩處適中之地擇要駐紮著安撫奏明辦理等因欽此查鮑超百戰驍將戰守自屬可靠惟新募之眾器械未精訓練未熟將來防後尙祈

聖明隨時訓戒嚴申紀律認真操練庶兵民可冀相安臨事可得實用至其駐紮處所須早酌定以便輪船就近停泊登岸臣先飭招商局道員唐廷樞坐小輪船在直境沿海一帶測量水勢據稱北塘迤東至灤河口約三百里靈屬平灘不但輪船無從近岸卽民船亦難停泊惟灤河以東撫甯境內之洋河口向多海船來往輪船亦易泊岸請指定該處停輪卸載等語臣已據稟分咨湖廣

督臣李瀚章暨鮑超查照既奉

諭令該軍於天津山海關兩處適中之地擇要駐紮臣查直境瀕海地方惟東路較爲空虛距京亦甚密邇前明設防薊州永平爲山海關後路重鎮義固有在今昔情事雖異而形勢無甚懸殊臣愚以爲鮑超一軍宜屯紮於永平府屬之昌黎灤州樂亭沿海一帶爲天津山海關兩處適中前後策應調度似甚靈便該州縣距輪船起岸之洋河口均僅百餘里轉運亦近可省沿途車馬供億之煩合無仰懇

聖恩飛飭鮑超遵照妥辦至該軍餉需軍火雜項每月約須九萬餘兩關係至重直隸固無從代籌各省亦難再指撥欽奉

諭旨著戶部籌給應用並請

敕部預籌接濟仿照吉林各處辦法飭由鮑超自行派員出具印

領按月就近赴部支給事竣卽由該提督自行報銷以專責成而
免轉轉理合附片遞陳伏乞

聖鑒訓示謹

奏

妥籌朝鮮武備摺

光緒六年九月初四日

奏爲朝鮮請求武備遵

旨妥籌恭摺密陳仰祈

聖鑒事竊臣承准軍機大臣字寄八月二十九日奉

上諭禮部奏據朝鮮國王咨稱該國講究武備懇爲轉奏請旨俾該國匠工製造器械於天津廠等語著李鴻章妥籌具奏其咨內所請簡選解事人員或於邊外習教一層並著李鴻章詳審其意一併妥籌迅奏該國使臣業經該部安置居住俟該將覆奏到日再降諭旨原咨著鈔給閱看等因欽此仰見

聖謨廣運眷顧東藩至意欽佩莫名伏查朝鮮僻處海隅向於外交之道禦侮之方漠不介意日本窺其孤弱脅以兵威先與立約通商實則隱圖侵侮去年七月臣密奉

諭旨查照前福建撫臣丁曰昌所陳各節致書朝鮮原任太師李裕元勅以密修武備慎固封守與英法德美諸邦逐漸立約藉以牽制日本即可備禦俄羅斯並告以熟悉西國商情軍火利器不難購辦等語已將原稿鈔呈

御覽是年十月朝鮮貢使入都道出永平據前永平府知縣游智開密稟李裕元給伊片函謂該國本意不欲與他國來往牽於眾議不敢主持惟該國輿論擬仿古外國入學之例咨請禮部揀選明幹人員赴津學習練兵製器之法臣謂果有成議未始非該國自強之基臣密屬游智開詳告該使本年二月復山游智開遞到李裕元去冬覆函大致謂泰西之學素所深惡不欲有所沾染又以該國貧瘠不能多容商船爲詞已將原函鈔寄總理衙門存案竊思地球諸國惟朝鮮開風氣最晚該國士大夫固於見聞昧於

時勢墨守成法閉拒忠謀雖口卽於危弱而不顧此殆有氣運主
之非人力所能爲者今該國旣以講武爲請正可因其一綫之明
迎機導導增彼軍實固我藩籬惟是該國練習此事卽使始終勤
奮其收效亦在數年之後就目前事勢而論則有迫不及待者自
去冬以來中俄和約未定積有違言俄之鐵甲快船兵船二十餘
隻陸續東駛並厚集陸軍分布吉林海濱之海參威摩闊歲一帶
豫儲煤糧軍火甚富六月間有美國水師總兵蕭佛爾赴朝鮮議
約被拒旋來津與臣會晤據稱美國尙無用兵倡勒之意但俄人
已費巨餉遣將調兵勢必不肯中止若不圖中華恐遂吞併朝鮮
八月間法國水師提督瞿貝費過談謂探聞俄海部尙書里沙士
幾之意欲赴瑣春攻奪朝鮮海口陸則斷奉吉之右臂水則扼北
洋之襟喉規畫甚爲雄遠又謂朝鮮東界海口形勝爲東方之最

俄人故欲取之以與琿春海參崴等處掎角其餘各處探報及新聞紙所論大致相同蓋俄人所據之海參崴綏芬河圖們江各境皆與朝鮮東北接壤彼既佔東海口岸爲巢穴自必漸圖開拓若吞併朝鮮卽拊我東三省之背使中國岌岌不能自安是朝鮮與我國實有唇齒相依之勢不能無休戚相關之情當此兵餉兩絀中國沿海各口尙未能處處周防斷無餘力兼顧藩服似祇能就其力所逮者而利導之萬一俄事稍紓俾朝鮮得於數年內力擴新機整軍經武保衛東隅未始非中國之幸也惟該國匠工來津學習機器此中亦有繁難之處查天津初設機器局不過仿造洋火藥銅帽等項厥後疊次擴充添購機器火藥多出數倍自造土乃得林明登後膛鎗子克鹿卜格林後門礮子蚊船大礮子之屬光緒元二年閒亦曾自製後門鎗因工費甚鉅較購自外洋者價

幾逾倍卽經停止各軍所用鎗礮專向西洋定購但源源供給予
藥零件今朝鮮匠工來學卽使盡嫻各法聞該國所用土鎗僅與
中國綠營之擡鳥鎗相等其製造機器及新式鎗礮仍須購自外
洋是無其器而不能用也西洋鎗礮其準綫口令步伍非操演數
年難以純熟是無其人而不能用也臣愚以爲既准該國來習機
器將來必須代爲購器代籌練兵皆事之連類而及缺一不可者
又該國匠工言語不通來局之後應如何設法教導俾獲漸窺門
徑擬請

敕下禮部揀派通事人員伴送該國使臣卞元圭到津由臣督同
局員與之熟商辦法再行奏明請

旨施行至該國王原咨內所稱簡選解事人員或於邊外習教及
來學往教等語文義似未甚明晰臣就事理度之今如中國派員

往教該國既無機器匠工又無現成鎗礮斷難獲益自應先由該國挑選匠工來廠學習并選聰穎子弟來津分入水雷電報各學堂俾研西法本末兼營較有實際至練兵一事將來或選派熟悉員弁往教或由該國派隊來從我兵操演購器一事或垂中國訂購之便寬爲籌備劃付均應隨時酌度情形妥商辦理臣比接李裕元來書頗知戒備不虞以請戎穀械爲兢兢並致送禮物甚厚想因所圖之事關係頗重意在豫聯情誼從前李裕元以該國邊事與臣通問每附土儀數種臣援古人贈帶獻衣之義兼仿盛世薄來厚往之經必爲加倍酬答此次禮物較多未敢擅便謹將原函及禮單鈔呈

御覽應否收受由臣加倍酬答之處伏候

聖裁至朝鮮與西人通商一節實係謀國要圖與練兵製器相輔

而行其李裕元來函俟奉

諭行後即當裁覆臣仍擬不憚苦口諍爲開導冀其或有轉機庶

免爲他國所兼併所有朝鮮講求武備遵

旨妥籌緣由恭摺山驛密陳是否有當伏乞

皇太后

皇上聖鑒訓示謹

奏

御覽

謹將朝鮮國政仕太師李裕元來兩並禮單敬繕清單恭呈

文華殿大學士肅毅伯爺爵前本年季春

貢使回得承永平游太守書盛傳爵前仁政布於寰內威名施諸海外莫非尊

主庇民有辭千秋小邦黎庶咸思霑溉之恩非不欲種種恭探鈞節山海漠漠界疆有限末由展誠景仰結嚮曷有其極秋涼驟至鈞體度對時萬康警鐸不動衛戍凝瑞瞻望津雲若拜床下小邦日本之人稍似講好德源開港商舶來往江戶送使書契修謝姑無圭角實賴爵前左右之力實遵爵前指教之方而忽於春夏間佛國及米國書本自萊館要其送納小邦以非約條中事措辭退卻蓋他國書之自日本稍送不得施行曾有交鈐而然也若有意

外層節則不得不仰告於爵前更蒙乙亥冬斥退森有禮之澤此舉國之所仰望也小邦國王此際憂虞宵旰靡弛文而崇儒重道武而講戎器械先選六條之士廣開百技之門惟我

上國是則亦惟我爵前是倚派定別咨官卞元圭前往

京都齋文陳白於禮部未知回施之如何而上年因游太守言已知爵前之微意故敢將咨草先從永平以爲轉達伏維慈惠之念必有周全若或

准可則下次事無鉅無細專仰爵前稟定而不以卑鄙隨處戒飭俾有實效奚特一邦之幸亦獲藩屏之固矣小生依舊在林泉逍遙之閒老噴轉甚無足相問而今於茲事不敢辭爲張皇愬衷兼奉禮單庶或亮收不備謹呈直隸總督伯爺爵前

庚辰七月初九日

禮單

倭綢疋紐十端

曲生綃十端

土綢二十端

上黃細絺布十端

上白細絺布十端

加重生綢五十端

細棉布五十端

大漆篋二百把

芭蕉圓扇一百柄

大圓扇十柄

細簾子五雙

滿花席子十立

色紙二十組

大搗厚紙三十組

白楮二百束

上上製山種清心元一百九

紅仁參五十斤

白仁參三十斤

大鯰魚二百箇

江瑤珠一百貼

柚子清一缸

蘇果一缸

計二十二種

朝鮮國王移部咨文稿

朝鮮國王爲請講究武備事竊以小邦久沐

聖化偏荷

洪私柔遠之

德每矜其不能字小之

恩多基其不及無幽不燭有願必施當職恆與一國臣庶北向攢
祝隕越於下圖報萬一之念不忘跬步之頃矣今有區區切至之
願而徒懷嚴畏不思轉聞則是

皇慈視均內服而小邦還自疏外也惡乎可蓋聞兵可百年而不
用不可一日而無備奚謂之備卽兵戎之具是已良兵良器以待
大用見於周制除戎器戒不虞著於易象良有以焉惟小邦屏翰
上國竭力禦侮何翅如子弟之衛父兄手臂之捍頭目而其捍衛

之要不亦在乎兵備歟矧又邇年強鄰窺覷憂殷伏莽正須戒不
虞待大用之時也若禮部有咨使小邦悉心籌畫計出萬全不得
稍涉疏虞可也云云職由是耳蒙此警示非止一再對證砭藥銘
肌難忘而第念小邦以樸拙其俗荒嬉成極武備講究徒憑古書
而無異談龍器械善修只依圖式而便聞刻鵠五兵飭材一任鈍
工其句則彈其刺則蝟其鍛則不摯每思器械不利以其卒于敵
之古語不覺寒心於是一國輿論咸以爲

上國軍器精利以威天下者欽仰久矣而天津廠等處實四方巧
工之所會各國神技之攸萃也亟宜選送明幹人員情願學造器
械之意聞於

皇上恭候

誕綸爲今急務當職仍伏念我

皇上聲教訖海醴郁錫世威輝達於四極禋祀溥於萬區至若小邦常飲醇和最被覆露苟此輿情之得徹庶幾

寵施之不靳而惟畏越是懼不敢直具奏本先茲懇陳情事於部堂大人仰冀曲加恕察卽爲導達特降

隆旨俾小邦匠工學造於津廠且簡選能事人員或於邊外極微獲遂來學之願亦紆往教之道隨處方便竟能有成則內而竭屏翰之職外而盡禦侮之方環東土數千里幾萬生靈永賴以安頌戴

帝力豈特與穹壤而無窮也不任誠懇祈祝之至專差行副司直卞元圭齎咨前去爲此合行移咨請照驗轉

奏施行

操演水兵備用摺

光緒六年九月初四日

奏爲酌調登榮水師艇船弁兵來沽操演以備碰快船購到配用恭摺仰祈

聖鑒事竊北洋定購英廠碰快船二號約於明春抵津所需水勇三百名亟應先事籌備操演以資配駕前擬預購練船選募北省丁壯上船學習惟輪船夾板購價頗巨經費支絀不得不設法節省通融酌辦因思山東原設登榮水師艇船船身本小平時巡緝附近海面爲捕盜之用若遇強敵戰守皆未足恃且無得力陸軍依護有事適以資敵若令該艇船駛入大沽口內就原有弁兵挑選操練則碰快船購到即可移駐庶化無用爲有用當經咨商山東撫臣旋准覆稱除酌留數船分防汛地外飭派該營水師副將唐廷威等帶領艇船九號及隨船弁兵器械陸續駛到大沽臣卽

飭督操礮船記名提督丁汝昌總教習洋員葛雷森營務處道員
許鈴身分別驗收挑選該員等於八月二十三日驗收船隻挑
留千總袁培英等四名兵丁三百零六名該弁兵等曾經德弁瑞
乃爾教操數年熟悉洋法再加練習可備碰快船礮手水手之用
已責成丁汝昌葛雷森認真督練兵船技藝務使屆期可資分撥
惟該弁兵原領口分無多不足贍養所有袁培英等四弁應於例
支俸薪外由津局每名月給津貼銀六兩其兵丁口糧已在東省
領至夏季止應自七月初一日起由津局每名月給銀四兩核與
各營陸勇口分相符無庸再由東省給發又九船共用文案二名
每名月給銀八兩亦自八月二十三日起支均由海防經費內籌
發其挑贍弁兵一百三十餘名卽酌給川資仍令唐廷威等帶回
歸伍所有備練碰快船水手緣由理合會同山東撫臣周恆祺恭

荆其陳伏乞

皇太后

皇上聖鑒謹

奏

何國荃力疾辦防片

光緒六年九月初四日

再山西撫臣何國荃過津晤商一切見其體氣面貌大不如昔兩足痿跛步履維艱眠食短少憔悴可憐之狀僚屬均爲驚詫實因前在軍營多年受傷積勞氣血已虧又值晉中頻歲大災肝脈經營竭力拯救蒼生雖已託命心氣更加耗損茲以時事多艱遵旨力疾勉赴山海關籌辦防務已由津起程忠

主憂國之忱老而彌篤惟兵力既甚單薄病軀久未復元

聖朝倦念勳舊知必有格外體恤優容之處臣目擊情形不敢聖

於上

聞伏乞

聖鑒謹

奏

海防支應請銷摺

光緒六年九月初十日

奏爲查明天津海防支應局光緒五年分收支餉需按款造冊請銷恭摺仰祈

聖鑒事據天津海防支應局司道會詳津郡海防改設練軍並原設海口礮臺通永鎮大沽協官兵雲字營馬隊應需餉乾等項向在津海關六成洋稅洋藥釐捐東海關協餉長蘆鹽斤復價甯河釐捐各項下隨時籌撥按照定章撙節支放所有光緒四年分收支款目業經奏咨准銷在案查光緒五年分原調奉省之天津練軍左後兩營添雇長夫口糧一項截至六月三十日停支改由奉省接續支發其官兵正餉加餉仍由津按三箇月一次解濟大沽北塘新城等處礮臺續設礮位照案支給操演經費此外支發款項悉照奏定章程及歷年准銷成案按月核給造具細數清冊詳

請奏咨前來臣逐加覆核計自光緒五年正月初一日起至十二
月三十日止連閏計十三箇月共收款銀三十八萬八千六百二
十兩九錢六分六釐五毫內因原撥稅釐不敷開支截留保定練
餉酌提天津釐捐濟用其支款應歸戶部核銷銀三十五萬七百
三十三兩九分三毫一絲八忽六微應歸兵部核銷銀三千四百
九十四兩四錢應歸工部核銷銀三萬四千八百六十二兩八錢
九分九釐七毫九絲二微其應銷銀三十八萬九千九十三兩三錢
九分一毫八忽八微除本案內扣收過平餘銀三百四十八兩六
錢二分八釐九毫九絲七忽八微儘數動支外計不敷墊支銀一
百二十兩七錢九分四釐六毫一絲一忽俟准部覆再行找給歸
墊除清冊咨部查照外所有天津海防收支餉銀造冊請銷緣由
理合恭摺具陳伏乞

皇太后

皇上聖鑒敕部核銷謹

奏

安籌朝鮮製器練兵摺

光緒六年九月二十七日

奏爲遵

旨詢問朝鮮一切情形安籌學習製造及練兵購器事宜恭摺

陳仰祈

聖鑒事

竊臣承准軍機大臣字寄九月初六日奉

上諭李鴻章奏遵籌朝鮮請派匠工學造器械一摺朝鮮爲東北藩服唇齒相依該國現擬講求武備請派匠工前來天津學造器械自宜俯如所請善爲指引已諭令禮部揀派通事伴送該國齎奏官卞元圭赴津著李鴻章詢問一切情形再行奏明辦理李裕元致李鴻章摺內並著酌度情形作替答覆俾知領會等因欽此仰見

聖主撫字藩邦有備無患至意欽佩莫名旋准禮部遵派通事伴

送朝鮮齎奏官卞元圭於九月十六日抵津臣卽委令津海關道鄭藻如永定河道游智開及辦理機器軍械各局候補道許其光劉含芳候選道王德均等先行會同傳詢一切該道等連日與之筆談稍知該國大概情勢復導往機器局製造局軍械所及西沽儲備火器火藥各庫徧加觀覽俾識端緒臣旋於九月二十二日傳見卞元圭亦與筆談良久該使臣頗留心時局非固於一隅拘執成見者可比玩其詞旨甚有憂國之心亟欲整練士卒購造利器以備不虞其忱於外侮迫不及待之情與倚我聲援切求保護之意時於言外見之茲督同鄭藻如等就時地之宜與該國力所能逮者酌擬辦法蓋製器必求用器之人則與練兵相連練兵而所用之器有非倉卒所能自製者則又與購器相連今爲該國籌畫製造一事當擇易辦而急需者行之如子彈火藥及修理軍械

之機器必須酌量購備朝鮮王城現兵三萬應分礮隊馬隊步隊
爲用器之則礮隊擬購克鹿卜後膛鋼礮馬隊擬前後膛鎗各半
步隊以三分之二用前膛鎗其餘間用後膛鎗而沿海要隘之需
及水雷電機之學又在該國循次擧力而行不來學往教兩層該
國君臣初意重在往教查朝鮮義州與奉天新設之安東縣僅隔
鴨綠江彼意欲購取機器邀往教師由中國揀派明幹人員卽在
安東設局傳習製器操兵之要仍不時遣人到津通聲息而便觀
摩惟機器購之西洋非經年不能運到應由該國先選聰穎藝徒
來津就現成之器師取工之巧可以事半功倍俟其粗得門徑然
後器匠同歸卽教者亦易爲力此製器之宜來學而後往教也鎗
隊礮隊操法不同若先派數員往教恐言語不通卽步伐止齊口
令手法呼應不靈若先選該國弁兵數十人來津分隸各隊朝夕

操演耳濡目染所得較多俟鎗礮購到然後隨同所派之員歸司
幫教庶可遞相傳授此練兵之宜來學而後往教也該道等將此
數端與該使臣往復籌議擬具節略均甚周妥惟舉辦之遲速購
器之多寡視乎該國經費之優絀非該使臣所能預定應俟歸報
國王與其大臣妥商定議臣飭局先選來福前膛鎗十桿酌配子
藥銅帽各項毛瑟後膛馬鎗十桿連後門子二千箇交該使臣攜
帶回國俾該國觀其式樣稍知梗概除已飭卞元圭回京候
旨外謹將擬具來津學習製器練兵各條鈔呈

御覽擬請

敕下禮部咨照該國王相度便宜自行酌辦李裕元寄書兩亦
卽妥爲答覆俾知領會所有遼籌朝鮮學習製造兼練兵購器事
宜恭摺由驛覆陳是否有當伏乞

皇太后

皇上聖鑒訓示謹

奏

謹將朝鮮派人來學製器練兵分條擬具清單恭呈

御覽

製造一事所包甚廣不可不分別難易緩急中國勦立各廠十有餘年費用餉項約數千萬得入門徑始知有必須自造者有不必自造者茲爲該國籌畫當擇易辦而急需者行之如鎗礮既購辦矣而子彈須源源接濟若專恃購辦必有緩急難恃之虞此必自行製造者一也軍械常有損壞修理必藉機器此必自行製造者二也蓋行造必自邇登高必自卑所用機器除造後膛鎗子須全分機器此外不必全藉汽機應以人力運動者爲宜可擇汽機小者購一二具以運車床刨床鑽床而已軍械之中火藥爲最要西藥佳處全在硝磺提淨壓至結實礮工與臼舂之工無異機器礮盤似可省也僅購提硝器具壓水機器皆用人力者則省費約十

之六七至於造鎗子銅壳非購全副機器不可如購辦各種軍械器具之議既定則擇該國年十五六以至年二十歲者數十人分入兩局學習各種技藝其選擇之人除畫圖汽機而外應於該國素業銅鐵木各工匠內心思靈巧者選派來學如欲驟效恐亦不能緣製造之學無窮盡也俟期年後略得要領及器具購到則隨之回國自有把握庶不致茫然無從下手矣

一畫圖本諸算學爲製器之根源須擇年十五六聰明而有悟心能通文義者四人分隸學習工師之才由此出焉其學無止境

一木樣廠凡製一物必須先做木樣應擇該國木工有心思年二十內外者四人分隸學習

一翻沙廠此種工夫較易學習惟鎔化銅鐵習練眼力分別火色配合料作亦非易事須擇年力精壯有膂力有心思者四人分隸

學習

一鎗子廠捲銅廠機器繁多應選四人專入東局學習

一機器廠須寬爲選派應擇年十五六者四人按照車床隨師教導但車床工夫是以機器製器能知換用車刀分配齒輪便入門徑惟執錘用鑿用鎚以手製器工夫較難修鎗工夫亦應學習此四人應分隸兩局學習

一汽車機鍋爐廠須選年二十上下者四人分隸學習汽機煤爐之事

一熟鐵廠須擇該國素業鐵工者四人分隸學習製造鍋爐該國熟鐵工匠原不乏人有樣自可仿造惟於鍋爐釘鐵工夫未易學習

一火器廠須擇年十五六者四人分隸學習配合拉火藥藥各料

一電氣房須擇年二十以內者二人專隸南局學習電引電機電表各種技藝爲水雷引電之用蓋電學理極精微機關奧妙最難深造如聰明過人學之亦可漸入門徑

一製火藥應擇該國向習此藝者三人專隸東局學習不必年輕爲其已入門徑自知慎重則進益較易

一製鑼水應擇年二十內外聰穎者一人專隸東局學習

以上共計約三十八人分入兩局學習居住之處兩局各有工匠住房無庸賃買

練兵購器兩事該國齎咨官書稱王城現兵三萬馬兵居其一步兵居其九此時既擬練兵應分礮隊馬隊步隊爲用器之則除馬隊三千已有成額則步兵二萬七千之中應分三千爲礮隊礮可少用而礮兵不可少練也馬兵三千應備馬鎗若全用後膛則經

費太鉅不用後膛則禦侮無資擬以前膛後膛各半後膛用德國毛瑟鎗前膛用英國恩費爾來福鎗其餘步隊二萬四千以四千人分執雜器應以二萬人執鎗卽或用一半後膛其經費已恐難措應以三千桿爲後膛鎗一萬七千桿爲前膛鎗費用較省由漸而入力或能支礮位一項專宜求精與其購買英法之前膛礮不若專購德國克鹿卜後膛鋼礮該國沿海要隘無從懸擬若以行仗論之至少亦須四磅窄輪後膛礮十八尊過山後膛礮十八尊連子彈價值費用已須六七萬兩合前後膛鎗鎗子銅帽各款已約二十餘萬而沿海要隘之需仍不在此數之內是在將來循次量力舉行更及水雷電機之學至於練兵似宜先來學而後往教鎗隊礮隊操法各有不同若先派數員往教不但目前無器可習卽步伐止齊口令手法殊難徧及且言語莫通事事倚仗通事是

則教者之情難以周達而學者之心志亦無所適從必須先選該國精明強壯之弁兵數十人分隸天津鎗隊礮隊朝夕專習俟鎗礮購到亦將期年而一年之中該弁兵耳聞目見志求心得必能躡有規模然後隨同所派之員帶器同歸分司幫教則教者易教而學者易學矣此練兵一層必須先來學而後往教者也合將約議代購鎗礮經費附開於後

擬以三千人爲礮兵用克鹿卜四磅後膛礮十八尊連車架每尊約價銀一千五百兩計銀二萬七千兩每礮配子三百箇共五千四百箇每箇約價銀一兩計銀五千四百兩用克鹿卜兩磅過山後膛礮十八尊每尊配子三百箇價與前相等

擬以三千人爲馬兵用後膛馬鎗一千五百桿每桿約價銀六兩計銀九千兩每鎗配子五百粒共七萬五千粒每千粒約價銀二

十二兩計銀一萬六千五百兩用前膛馬鎗一千五百桿每桿約價銀三兩六錢計銀六千五百四十兩

擬以二萬人爲洋鎗步兵用後膛鎗三千桿每桿約價銀九兩計銀二萬七千兩每鎗配子五百粒共一百五十萬粒每千粒約價銀二十二兩計銀三萬三千兩用前膛鎗一萬七千桿每桿約價銀三兩計銀五萬一千兩共配用銅帽一千七百萬粒每萬粒約價銀八兩計銀一萬三千六百兩

以上共計銀二十二萬一千四百四十兩

擬議朝鮮來學章程片

光緒六年九月二十七日

再臣督同津海關道鄭藻如等詢議朝鮮製器練兵事宜擬定大概規模已專摺具陳在案據該使臣卞元正呈稱朝鮮武備早宜購求所以遲至今日者實因外藩私購戎器有干例禁迨時勢既迫始敢籲請猶恐緩不濟急又稱該國義州距營口僅六百里由營口附輪船直達天津不過數日或自津門航海東駛可徑泊該國黃海道之長淵豐川兩府將來領運器械來學員弁當從海道爲便捷等語雖格於定例而軍需緊要未便過涉拘泥轉阻其嚮化之誠因飭鄭藻如等與該使臣酌議章程四條於通融中略示限制查外藩派人來華習武本屬創舉自應因時變通如選派人員一條令其自備資斧以免供億之煩仍許借給住房用示綏懷之誼往來道路一條惟來學之員弁兵匠及領運器械准其暫從

海道此外朝貢及常行公事仍須恪遵

成憲斟酌於經權之中似尙無甚流弊給發憑票一條所以備稽
查而便約束至從人不必多派亦不得私帶商販貨物關稅可免
短絀公文分咨一條若循向例朝鮮來文須由禮部轉行然練兵
學藝購器諸物皆屬刻不容緩設事事由禮部核轉在該部既滋
煩瑣兼恐有誤機宜今令該國分咨禮部及臣衙門以免迂折而
昭迅速仍由臣隨時奏明辦理凡此四端皆已再三籌度不厭精
詳謹將擬議來學章程鈔呈

御覽是否有當伏乞

聖鑒訓示施行謹附片具

奏

謹將朝鮮齎咨官卞元圭與津海關道鄭藻如等擬議該國員弁來學製造操練章程錄呈

御覽

一擬選派三十八人分入東南兩局學習製造以兩員分管之通事傳語者東局用二人南局用一人又選派精明強壯弁兵四十人分隸親軍鎗礮營內學習操練亦以兩員分管之通事傳語者二人以上其以八十七人爲額資斧火食等項皆朝鮮國自備惟住房由中國借給

一朝鮮國朝貢信使往來所經道路自必永遵成憲惟此次派人來學係屬破例之舉若得徑從海道更覺便捷且製造操練等事一二年內當可探討門徑爲期不至過久擬請酌量變通奏咨立案暫由海道來往不在期請常行公事之列除來學之弁

兵學徒委員通事從人而外別人別事不得援照辦理至朝鮮國請中國代購軍械機器等件俟購到後由中國咨照朝鮮方可派員從海道前來領運

一委員弁兵學徒通事人等由北洋大臣衙門給發空白憑票交朝鮮國按名填給并造名冊呈送北洋大臣衙門及禮部備查到中國後遵守中國規矩專心聽教儻或不遵約束由中國官發交派來委員查核辦理至隨從之人數用爲止不必多派亦按名給予憑票附列冊末一體遵奉約束不得私帶商販及一切貨物一凡屬練兵學藝購器軍務公文由朝鮮國王分咨禮部及北洋大臣衙門以歸便捷

朝鮮通商西國片

光緒六年九月二十七日

再朝鮮與西人通商一事係其今日謀國要圖臣前奏明俟覆李裕元兩仍擬善爲開導冀有轉機惟李裕元致仕家居雖尙得與聞朝政而一切謀議設施究由該國君相主持此次齎奏官卞元圭來津謁見臣與筆談良久觸類引伸俾徐悟保邦之大計卽臣上年七月致李裕元一函彼亦知爲忠告因與開誠布公迎機善導剴切而詳示之聞朝鮮與日本通商數年尙未收稅彼並不知稅額重輕臣告以西洋各國通例令勿爲日本所蒙且知重稅之有裨國計朝鮮與法美有怨慮其見侵臣告以法美志在通商並無用兵強逼之意而俄人則窺伺甚急朝鮮東北海口與俄接界防禦太疏臣告以德源永興口旣非日本開埠儻俄人以兵船闖入或先禮後兵應派員相機接應酌允通商議約免致動兵後格

外喫虧朝鮮欲在德源埠築臺置礮恐爲日本藉口臣告以東西各國通商口未有不築礮臺以自防護者乃係自主之權凡此皆所以破其惑而使之自強開其意而使之自悟該使臣似聞所未聞中心悅服一切俟歸報國王妥爲酌度當不至如從前之扞格查朝鮮三面環海其形勢實當東北洋之衝而爲

盛京吉林直隸山東數省之屏蔽其民人能耐勞苦物產亦非甚絀五金煤鐵之礦未經開采儻爲俄人佔踞與吉林黑龍江俄境勢若連雞形如拊背則我東三省及

京畿重地皆岌岌不能自安關係甚重日本近與開埠陽爲各國先容而陰嫉朝鮮堅拒其意亦甚叵測茲欲杜俄日之隱謀惟有與泰西各國一律通商尙可互相牽制子然常存然聞見以閱歷而始廣風氣山倡導而漸開該國於製器練兵旣知加意講求商

務一端或終有擴充之望謹照錄上與卞元圭筆談問答節略恭
呈
御覽除密咨總理各國事務衙門知照外謹附片密陳伏乞
聖鑒謹
奏

謹將九月二十二日接見朝鮮齎咨官卞元圭筆談問答照

鈔恭呈

御覽

問該國相臣何名

卞答領議政李最應六十六歲今王叔父宗親封君初爲興賓君
問議政亦猶中朝之軍機大臣否其人中外政務兵事均洞悉否
卞答議政卽古之丞相中書令平章事也中外諸務均得與聞
問與日本通商兩口曾設關否歲增稅項若干

卞答東萊口已有關德源口方設關未完稅額尙未一定

問東萊開口已數年何以稅額尙未定聞日本輪船常至豈能有
貨無徵

卞答兩口俱完工程行將一併定稅

問中國初設洋關未知西國通例按貨值百抽五貴國定額擬值百抽幾

卡答此在兩國論定廟堂必有成算而陪臣位下無由預知敢問抽幾庶可得中

告以泰西各國大率入口稅重出口稅輕土貨出口稅輕所以恤吾民生利吾物產也

又分別貨之貴賤銷之暢滯酌定等差有每百抽二三十者有每

百抽十數者故歲入較多中國初不知此例為西人所蒙進出口

概定為值百抽五條約既定至今一成不可易雖販運內地加半

稅二五然喫虧實多貴國甫開通商稅額必須加重可以自主否

則各國援例而來必有後悔

卡答出入口稅參酌輕重實維石畫指教敬當據以歸告思所以

恤吾民利吾產仰副德意之萬一

問吾去年七月致李太師密函勸與西國通商蓋稔知各國見目
本開埠必有繼往求索者貴國主意思須早日定若不得已而與各
國通商重加稅則利在我安定條約害亦有限不圖貴國眾議
不以爲然而各國覬覦終無已時兵力又恐不能自守爲害甚大
卞答此國之大事陪臣雖位下人微亦有所聞矣非不知前秋密
函下示備極忠告而特因與彼有怨未便遽和謹將尊教一一歸
告

問所謂與彼有怨想指法美兩國前事而言聞法美尙不欲遽加
兵但求通商而已俄界逼近實欲在東海開拓口岸土地目下兵
船麇集海參威圖們江一帶與貴國擊柝相聞貴國何以備之又
聞貴國民人在俄界貿易工作者甚多彼得藉以偵察虛實貴國
官府向與有文書往來否

下答俄之爲虞浮於法美小邦之北陲卽慶興慶源等地蜚螽逐末之類種種越去爲其難備則偵探虛實想亦必然之勢也但犯越者爲本國所獲法不容貸故輒一往不返邊民有爭桑之漸邊臣或有文書開解云非有按例往來

問德源永興海口聞各國豔稱形勢險固爲東海之最俄人有意圖之貴國於該口有礮臺兵船否吾於此甚爲焦系請以實告卡答海口要害雖有船礮然船是木板礮皆舊製庸是憧憧從小邦之事全仗中堂維持今當艱危之秋伏願加倍留念仰紆重宸東顧之憂俯慰編氓止拱之誠無任祈懇願祝之至問俄人詭詐異常吾曾詢有此意否答云無之然各國從旁窺探謂其實有是謀但尙未發動明春必須謹防若屆時彼之大隊兵船竟回貴國須早留意

卡答武經云知彼知己百戰不殆所以寡君憂深慮遠戶加偵刺
來咨有強鄰窺覷之語卽謂此事也苟非中堂視均一室誰肯明
教而代籌其將來耶伏乞連加詢探而亦或有鎮壓排解之道更
願隨機方便保無他患千萬至祝固知早蒙關垂無待陪臣縷白
然情窮勢迫安得不屑瀝乎庶可原其心而宥其罪矣

問鄙意未與日既准日本通商儻俄人遽以兵船闖入或先禮後
兵貴國須派委員與之接應相機酌允通商議約如何議法權仍
在己此卽排解之道若待動兵後議約喫虧甚矣

卡答敬當一一歸告而鎮壓之要在乎中堂伏願特垂終始之惠
焉小邦咸鏡道卽國祖康獻王肇基之地也四世仙寢於是乎安
且五金之類於是乎產其民勇而無謀習於騎射堪稱北方之剛
惟是德源元山爲陸海咽喉所以小邦多年新持究竟萬不獲已

而許其開埠矣。儻或有事於此地，則咸鏡一道非我之有何則扼其喉，則呼吸豈能通乎？握管焦心，不知所裁。

告以中國陸軍尚可自立，水師仿造兵輪船多隻，僅能自護口岸。剿辦土寇，或與他小邦角勝。若俄水軍強盛，目下吾力尙未足與馳逐大洋，其勢實未便遠顧東海。卽未敢云鎮壓貴土永興一帶也。俟數年後鐵甲快船稍備，卽意令其出巡，偶泊貴國海東各口，聊作聲援。蓋本大臣北洋轄境與貴邦海岸毗連，諒若一家，本無畛域。現今力量萬難兼營，若俄意不測，貴國委蛇待之，羈縻勿絕，亟圖練兵製器自強之策，猶可爲善國也。泰西通例，公法無無故稱兵奪人土地者。若堅拒固閉，彼得有詞，不可不熟慮之。卞答先禮後兵，先兵後禮，固當商敵爲資，未可預料而德源埠頭之役已自春間經始矣。今忽添築礮臺多排大礮，則日本之人必

將藉爲口實若束手坐待尤非禦侮之策伏乞明賜指教俾有牽從千萬祈懇

告以東西各國通商口未有不堅築礮臺以自防護者日本似不能藉口果相詰問答以此係我國自主萬國通例但須約束弁兵不得滋事耳

下善謹承明教辭旨鄭重披露無隱忝在下風曷任感激數年之後輅境巡泊威聲所被想足震懾而目下憂虞靡所止屆寡君智勇仁明諒有以善後而陪臣漆室之見自不免憧憧竊有鄰邦滋憾之事琉國爲日本侵奪卽公法所不許也天下各國其將公議而興亡繼絕乎

告以日本之於琉球自謂前明中葉卽爲藩屬併球後以新聞紙徧告各國各國亦輒信之公法乃泰西所訂東土未必照行但各

國通商公共之口一國不能獨佔佔之則必羣起而爭故去秋密
商貴國酌允各大國通商亦慮俄日之將有事於朝鮮也

下答無論鉅細歸候貴君斟酌

問貴國所求派人學習製器練兵各事業令諸位道臺與之妥議
數日昨呈略摺大端已甚詳晰貴官能遵允否

下答此事係前古所未行素意所不畜乃敢咨請者仰恃

大明之於小邦有顧必從無願不遂之

德意亦維我中堂眷比之惠澤如有所教敢不奉遵

告以茲有節略草稿一本望攜回細閱條議具覆或有疑難再與

諸道酌商轉稟

下答各條周密精核無庸更議若有事時乞從海道往來前布告

於諸位道員諒蒙鑑燭

告以朝貢信使來往必須恪遵成憲此係破例之舉若徑從海道自更便捷仍令諸道會商妥議章程憑票等事呈候具奏請旨定奪

卞答陪臣前日仰請本自如此而不必今日明日隨便裁處惟圖濟事

鮑超赴防片

光緒六年九月二十七日

再湖南提督鮑超於九月初六日由武昌乘招商局輪船北來沿途擱淺於二十三日行抵天津與臣晤商一切擬俟該軍馬步各營陸續到齊調紮灤州認真操練以備游擊之師該提督卽於二十六日自津啟程前赴防所察度布置理合附片具陳伏乞

聖鑒謹
奏

李文忠公奏稿卷二十八